

Канон Индикту (Новолетию)

Празднуем 1 (14) сентября

Тропарь, глас 2-й

Всея твари Содетелю, временá и лета во Своей власти положивый, благослови венец лета благодости Твоея, Господи, сохраняя в мире Императора, и град Твой, молитвами Богородицы, и спаси ны.

Канон, глас 1-й

Песнь 1

Ирмос: Поим вси людие, от горькия работы фараони Израиля Изведшему и во глубинé морстей ногами немóкрыми Наставльшему, песнь победную, яко прославися.

Припев: Слава Тебе, Боже наш, слава Тебе.

Воспоим вси Христу́, Имже составишася всяческая, и в Немже совершишася неразлучна, яко из Безначальнаго рождшуся Бога Отца́ Ипостасному́ Сло́ву, песнь победную, яко прославися.

Слава Тебе, Боже наш, слава Тебе.

Воспоим вси Христу́, Отчим благоволением явльшуся из Девы, и проповедавшу лето Господне приятно, нам на избавление, песнь победную, яко прославися.

Слава: В Назарет пришед Податель закона, в день субботный учаще, законополагая евреем пришествия Своего неизреченнаго: имже яко Милостив спасает род наш.

И ныне: Поюще вси вернии Предивную Отроковицу, Христа́ вселенней возсиявшую, и радости всяческая исполнившую, Присносущныя Жизни, присно восхваляем, яко прославися.

Песнь 3

Ирмос: Утверди мене, Христе́, на недвижимом камени заповедей Твоих, и просвети мя светом лица Твоего́. Несть бо свят паче Тебе́

Человеколюбче.

Сла́ва Тебе́, Бо́же наш, сла́ва Тебе́.

Утверди́, Бла́же, егóже насади́ любóвию на земли́ десни́ца Твоя́, плодови́т виногра́д, сохра́няя Твою́ Църковь, Всеси́льне.

Сла́ва Тебе́, Бо́же наш, сла́ва Тебе́.

В де́лех духо́вных Богокра́сных кра́сящихся, наста́вшее, Го́споди, ле́то си́е, преведи́, Влады́ко, и́же ве́рою Тя песносло́влящая, Бо́же вся́ческих.

Слава: Ти́хий ми, Христé, ле́тний круг дава́й, Ще́дре, и насы́ти мя словéс Божéственных Твои́х, я́же яви́лся еси́ глаго́ля иудéем в суббо́тах.

И ныне: Я́ко Еди́ну преестéственно па́че челове́ка благода́ть во Твою́ утробу́ приéмшую, и невращо́ рóждшую Христа́ Бо́га на́шего, при́сно Тя сла́вим.

Го́споди, поми́луй. (*Трижды.*) Слава, и ныне:

Седален, глас 8-й

И́же временá плодonóсна, и дожди́ с небесé пода́я сущим на земли́, и ны́не приéмля мольбы́ рабо́в Твои́х, от вся́кия изба́ви ну́жды град Твой: щедрóты бо Твоя́ и́стинно на всех де́лех Твои́х. Те́мже вхо́ды благослови́ и исхо́ды, дела́ исправи́ в нас рук на́ших, и согрешéний прощéние да́руй нам, Бо́же: Ты бо из не сущих вся́ческая во е́же бы́ти, я́ко си́лен, привéл еси́.

Песнь 4

Ирмос: Разумéх, Всеси́льне, Твоé смотре́ние, и со стра́хом просла́вих Тя, Спа́се.

Сла́ва Тебе́, Бо́же наш, сла́ва Тебе́.

Начáло Тебе́ ле́та лю́дие Твои́ прино́сят, а́нгельскими пе́снями славосло́вляще Тя, Спа́се.

Сла́ва Тебе́, Бо́же наш, сла́ва Тебе́.

Я́ко Человеколю́бец сподо́би начéншим ле́то и сконча́ти Тебе́ благоугóдно, Христé.

Слава: Вседержителю Еди́не Го́споди, лет обхожде́ния утиши́в, ми́ру да́руй.

И ныне: Я́ко приста́нище ны́не душ на́ших и твёрду наде́жду, Богоро́дицу вси воспо́йм.

Песнь 5

Ирмос: От но́щи у́треннююще, поём Тя, Христе́, Отцу́ Собезнача́льна и Спа́са душ на́ших, мир ми́рови пода́ждь, Человеколю́бче.

Сла́ва Тебе́, Бо́же наш, сла́ва Тебе́.

Исполня́яй вся́ческая блага́сти, Христе́, Ты благо­растворе́нием и благопло́дием, благослове́нми венча́емо, многокру́жное ле́то рабо́м Твои́м да́руй.

Сла́ва Тебе́, Бо́же наш, сла́ва Тебе́.

Ле́тное воздая́ние покажи́ нам преложе́ние к лу́чшим: ми́рное же устро́ение ве́дущим Тя, Сло́ве Бо́жий, уподо́бльшася челове́ком.

Слава: На зе́млю пришёл еси́, Собезнача́льне Отцу́, плёнником отпу́щение, слепы́м же прозре́ние от Отца́ возвеща́я, и вре́мя приятно́.

И ныне: На́ши наде́жды, Богоро́дице Чи́стая, и на́ше жела́ние на Тя возлага́ем, Ми́лостива нам даждь, Де́во, Егóже родила́ еси́.

Песнь 6

Ирмос: Проро́ка спасл еси́ от кита́, Человеколю́бче, и мене́ из глубины́ прегреше́ний возведи́, молю́ся.

Сла́ва Тебе́, Бо́же наш, сла́ва Тебе́.

Жити́е нача́ти, благоуго́дно Тебе́, Влады́ко, с ле́тным начинáнием, нас сподо́би. (*Дважды*)

Слава: Дней духо́вных, в поуче́нии зако́на Твоего́, покажи́ исполнены́, Ще́дре Спа́се, пою́щия Тя.

И ныне: Ро́ждшая Го́спода, Богоро́дице Всенепоро́чная, изба́ви от бед ве́рою пою́щия Тя, Пречи́стая.

Го́споди, помилуй. (*Трижды.*) Слава, и ныне:

Кондак, глас 2-й

В Вы́шних живы́й, Христé Царю́, всех вѣдимых и невидимых Творче и Зиждителю, Иже дни и но́щи, времена́ и лѣта сотвори́вый, благослови́ ны́не венѣц лѣта, соблюди́ и сохрани́ в ми́ре православно́го Имперáтора и град и лю́ди Тво́я, Многоми́лостиве.

Песнь 7

***Ирмос:* Отроцы благоче́стию совоспита́ни, злочести́ваго велѣния небре́гше, о́гненнаго прещѣ́ния не убо́яшася, но посреде́ пла́мене стоя́ще по́яху: отце́в Бо́же благослове́н еси́.**

Сла́ва Тебе́, Бо́же наш, сла́ва Тебе́.

Начина́ющи лѣто и пѣсней нача́ток сотворя́ем ца́рствующему Христу́, Ца́рством безконѣ́чным, правосла́внии лю́дие, благоче́стно пою́ще: отце́в Бо́же благослове́н еси́. (Дважды.)

***Слава:* Сый прѣ́жде век, на век же, и ещѣ́ Госпо́дь, воспева́ющим Тя, Христé, исто́чник бла́гости, благи́х Твои́х даро́в лѣто си́е испо́лни: отце́в Бо́же благослове́н еси́.**

***И ны́не:* Яко раби́ Влады́це на моли́тву, Чи́стую Ма́терь Твою́ Тебе́ предлага́ем, Христé, от вся́каго обстоя́ния лю́ди Тво́я, Бла́же, изба́вити пою́щия: отце́в Бо́же благослове́н еси́.**

Песнь 8

***Ирмос:* Песносло́вцы в пещи́ спа́сшаго дѣти, и громопла́менную прело́жшаго на ро́су, Христа́ Бо́га по́йте, и превозно́сите во вся ве́ки.**

Сла́ва Тебе́, Бо́же наш, сла́ва Тебе́.

Яко Нача́льнику спасѣ́ния, Христé, нача́ток Тебе́ прино́сит лѣтны́й, честна́я Це́рковь зову́щи: по́йте и превозно́сите Христа́ во ве́ки.

Сла́ва Тебе́, Бо́же наш, сла́ва Тебе́.

Из не су́щих вся́ческая му́дре обновѣ́вшаго Созда́теля, и Производя́щего вре́мен обра́щения хотѣ́нием, по́йте и превозно́сите Его́ во ве́ки.

Слава: Изводящему всяческая Бóгу, и времена́ Изменяющему, на многообразное человеков управлѣние, поём: хвалите и превозносите Христа́ во ве́ки.

И ныне: Богомáтерь Дѣву Чíстую, лет обхождѣнми же и обращѣнми, православно челове́честии собóри, поём Тя́ яко Богородицу, и всех спасѣние.

Песнь 9

Ирмос: Образ чíстаго Рождества́ Твоегó, огнепáлимая купина́ показá неопáльная, и ны́не на нас напáстей свирепѣющую угаси́ти мо́лимся пещь: да Тя, Богородице, непрестáнно велича́ем.

Слáва Тебѣ, Бóже наш, слáва Тебѣ.

Слóво Бóжие, и Сíла, íстинная Мúдрость и Ипостáсная, содер́жащая и прáвящая всяческая мúдре, и ны́не настав́шее рабóм Твои́м вре́мя, во устроѣнии тíсе произведи́.

Слáва Тебѣ, Бóже наш, слáва Тебѣ.

Вся дела́ Твоя́, Гóсподи: небеса́, земля́, свет и мо́ре; во́ды, и вси исто́чницы; со́лнце же, луна́ и тьма; звѣзды, огонь, челове́цы и скóти со А́нгелы восхваля́ют Тя.

Слава: Еди́н еси́ Превѣ́чный,́ яко Творѣ́ц веко́в: и ца́рствующее Триипостáсное Еди́но Божество́ неразде́льное, мо́льбами Чíстыя Богомáтере, ле́то плодоно́сно насле́дию Твоему́ покажи́.

И ныне: Спа́се всего́, и Строи́телю и Зижди́телю и Вседержи́телю тва́ри, мо́льбами безсе́менно Ро́ждшия Тя, мир ми́ру Твоему́ пода́ждь, соблюдáя Цѣрковь всегда́ немяте́жну.